

INUIT ATAQATIGIIT

INATSISARTUNI



Nuuk, 7. januar 2014

Inatsisartut Suleriaasianni § 37 naapertorlugu Naalakkersuisunut imaattunik apeqquteqarpunga.

(Inatsisartuni ilaasortaq Aqqaluaq B. Egede, Inuit Ataqatigiit)

Apeqqutit:

1. Aalisarnermut Naalakkersuisup Naalakkersuisup Siulittaasuata inooqataanik politikikkikut siunnersortissaminik atorfinitsinerata kingorna Namminersorlutik Oqartussat atorfinitsitamut aningaasanik qanoq amerlatigisunik aningaasartuuteqassappat?
2. Atorfinitsitap aningaasarsiassai qassiuppat? Soraartariaqalenera arlaatigut aningaasartuutunik malitseqassava? Aamma qanoq sivistigisumik aningaasarsiaqassava?
3. Politikikkikut siunnersortissamik atorfinitsitsisoqartarnissaa aalajangerneqarmat tamanut ammasumik sulisussarsiuussisannginnissaq Naalakkersuisut ataatsimiinnerminni tamarmiullutik aalajangerpaat?
4. Aalisarnermut Naalakkersuisup tunuartinneqarnissaa pillugu tusagassior-tunik katersortitsisoqarmat, Aalisarnermut naalakkersuisup kisitsisit kukkusut ingerlatissimallugit oqaatigaa. Taakkua kisitsisit pineqartut Naalakkersuisut ataatsimiinnerminni tamarmiullutik aalajangerpaat atuuttusanngortillugit?
5. Ilumoorpa Aalisarnermut Naalakkersuisup kisimiivilluni pisassiissutit qanoq agguarneqarnissaasa kisitsisitaai tamaasa aalajangersaaffigisimagaai? Taamaangippat aalajangeeqataasut kikkuppat?
6. Pisassat qanoq agguarneqarnissaasa kisitsisitaasa kukkunerisigut, aalisar-tut arlai eqqartuussiviit aqqutigalugit suliassanngortitsisimappat?
7. Siunnersortissanik atorfinitsitsisinnaalernissaq pillugu kaajallaasitaq 1. januar 2014-mi atsiorneqartoq tunngavigalugu sulisussarsiortarnermi tamanut nittarsaassisarnerup atorumaneqannginnera qanoq tunngavilersorsinnaavisiuk?

Tunngavilersuut:

Naalakkersuisunut ilaasortanut immikkut siunnersortinik atorfinitsisarneq aamma aningaasarsiaqartitsisarneq pillugu kaajallaasitaq 1. januar 2014 atortuulersinneqartumi immikkut siunnersortitut atorfimmit suliunnaarsitsinermi sulisitsisut aamma atorfillit akornanni inatsisitigut pissutsit pillugit Inatsisartut inatsisaanni aalajangersarneqartut malinneqassasut innersuussutigineqarpoq. Tamanna § 10, imm. 2-imi atuarneqarsinnaavoq. Kaajallaasitamili aammalu inatsimmi siuliani taaneqartumi aalajangersakkat paatsuungannarsinnaammata Namminersorlutik Oqartussat qanoq annertutigisumik aningaasartuuteqartariaqassanersut erseqqissumik paaserusunnarpoq.

6. januar 2014 tusagassior-tunik katersortitsinermi Aalisarnermut Naalakkersuisuusimasup avammut nalunaarutigivaa Naalakkersuisunut december 2013 ingerlanerani kisitsisinik kukkunertalinnik saqqummiussaqaarsimalluni taamaalillunilu Naalakkersuisut kukkusumik tunngaveqartumik aalajangiinneqarsimallutik.

Naalakkersuisut ataatsimiittarnerinit imaqarnilliat misissoraluarlugit tamanna annertunerusumik paasissutissarsiffigininnakku qanorpiaq pisoqavissimanersoq paaserusunnarpoq.